

LES

ARTICULA- TIONS DE PIERRE

Brallier, Apothicaire de Lyon,

S V R

L'Apologie de Jean Surrelh,
Medecin à S. Galmier.



A LYON,

1558.

ARTICULA

TIONS DE PIERRE

Brasler, Apollon de Lyon,

2 v. 12

L'Apollon de Lyon

1801-1802

2 v. 12

1801-1802

ARTICVLATIONS DE PIERRE
BRALLIER, APOTHI-
CAIRE DE LYON, SVR
L'APOLOGIE DE
IEAN SVRRELH.



*DES nouvelles, Messieurs,
Des nouvelles bonnes & bel-
les. Tout est gaigné, tout est sau-
ué. L'honneur des Medecins
ignorans (si iamais il fut esbranlé) est resta-
bli, & remis sus par vn (qui diray-ie) par
vn Hercules vengeur de maux, ou plutost
par vn Escarbot nouvellement sorty du fu-
mier, pour entreprendre la vengeance du
Lieure contre le Lyon. Par vn Iean Sur-
relh seur & seul vindicateur des Mede-
cins ignorans, contre moy Pierre Brallier
Apothicaire de Lyon, par cy devant respon-
dant à vn incertain Benancio Lisset, se di-*

sant medecin. Contre lequel Benancio, Sur-
 relh aussi se cōtrebāde, tant est seur & assen-
 ré de ses forces. estimāt peu le triōphe & la
 victoire de l'vn, s'il ne conioint les deux chā-
 pions cōtre luy seul, pour tous deux les rēdre
 maets, veincus, & outrez par vne braue
 Apologie, nouuellement & à grande instan-
 ce imprimée. Laquelle ayant discouru legie-
 rement, pour ma part (attendant que fera
 Benancio, qui parauenture me lairra icy
 seul combattre pour tous deux) i'ay ainsi
 articulée.

SVR LE TILTRE,

Apologie des Me-
decins, &c.



LES Medecins n'auou-
ront iamais ce tiltre em-
masqué de leurs personnes
faulsemēt supposées : ou ils
ne toucharent ne penfarēt
(peut estre) iamais, mesmement en nôbre
de pluralité, en tiltre d'œuure, ou n'y a
qu'vn escriuant seul, sans adueu, ne re-
queste, ne commandement des mede-
cins: au nombre desquels luy mesme au-
teur de l'œuure, n'est pas, & ne fut onq':
ains est par son dit non Professeur des
bonnes lettres (qui seroit trop vulgaire-
ment parlé ce luy semble) mais selon son
deuant-derriere, des bonnes lettres pro-
fesseur: C'est à dire (comme la chose est)
maistre d'escole à saint Galmier, descen-
du des hauets mōragnes d'Auuergne, ou
il a veu par exemples de couple diuerse
en nature se faire de petits asnes grands
mulets, & venu estre Trainebalay à la
Font-fort: de laquelle estant aluminé, a
songé estre illuminé, & à vn instant de-

uenu medecin:voire (si à Dieu plait) vindicateur des medecins: Pensant que par telle impudète audace, il pourroit estre tenu au reng des medecins: ce qu'il appert ambitieusement affecter. Mais le malheur est, qu'ils ne recognoissent pas volōtiers en leur ordre tels Grimaux: ains en lisant sa bigarrée Apologie, rougissent de honte pour son impudence, mesmement ceux, qui sont bons Philosophes, Grecs, & Latins, & pourueuz de bon sens commun, voyans vn tel asne se reuestir de la peau du lyon, & brauader en ses sottises souz le nom vniuersel des medecins.

Par Iean Surrellh Medecin.

Faux tiltre. Car, nō medecin: mais des bonnes lettres professeur à escorche-cul de la langue Françoise.

Sur l'Epiſtre dedicatoire.

A l'Epiſtre dedicatoire, en tant qu'elle n'est escrite à moy, ains à mōſieur Iaques du Puy, homme meritant dedication de chose meilleure, & plus hōnorable, & lequel

quel ie croy ne prendra pas grand plaisir à telles flateries parasitiques, ne m'est expedient de contr'escrire : ains laisser passer les lourdes sottises qui y sont, comme de mettre le deuant-derriere à sa mode, disant mon liure premier que celuy de Benancio, auquel neantmoins ie responderay, & faisant ses durement belles translations de la forge & de l'enclume, escorchant sanglantement le Latin de mot à autre, puis par tout entrelardant sentences Latines parmi les Françoises, mesmement de la sainte escriture, & puis les exposant & repetant en François, ou pour remplir papier, ou par presumption que le seigneur à qui il dedie deux ou trois fois son bel ceuvre, ne l'entēde pas : iagoit que puis apres il luy attribue vniuerselle science. Et s'il veult dire qu'il l'expose pour moy qui n'entens pas biē Latin, il n'en deuoit donq' point mettre, ains seulement le François: qui m'eust suffi. Mais c'est sa braue eloquence d'ainsi bigarrer sa parole de telles entretailleures latines, & le plus souuent impertinentes, comme cy apres ie montrерay: ce qui me sent à pleine gorge son magister scholar, ou plustost son
pres

prescheur de rogatons, duquel il garde si bien ceste maniere en ses escrits, qu'on peut facilement iuger, qu'il a esté moine, ou frere pedicant, dy-ie predicant: tellemēt, que celle ridicule affectation de Latiniser & faire bigarreuse de Latin parmi le François, voire avec belles escorcherics & incongruités (comme disant, il l'appelle *Charissimus Medicus*) luy est tant familiere, que son oraison n'est ornée d'autre eloquence que de telle entretaillee & bigarrée prescherie, autant esloignée, & impropre à philosophique disputatiō, dont icy est question, comme prochaine & propre à scholastique ou monastiq̃ declamation.

Il n'y a celuy qui ne croye, &c.

C E S T E belle entree d'Apologie n'est que vne perpetuelle prescherie de village, sottemēt entretissue de Latinisemens des deux testamens, mal rapiecez, in consequencez, en argumens aussi peu s'entretenans, que qui voudroit deduire vn cordage de seche arene. Lesquels ne font rien contre moy. Car ie ne suis negateur de la sainte escriture: ne contre mon li-
ure, qui

ure, qui ne parle point de la Theologie, pour les âmes, mais de la Medecine pour les corps, & de l'experience des facultés naturelles. Duquel la redargution deuoit estre Physique, non Metaphysique. Car disputation de Medecine est Philosophique, & naturelle, non Theologique, ne miraculeuse. Parquoy prenant le cas que ce soit vn sermon de Questain: fault faire comme au sermon, ne reclamer point au prescheur, mais le laisser dire, & s'il dit mal, s'endormir, plutost que contester à l'asne qui raille.

Omne donum optimum, &c.

Qui nie cela? que tout don parfait ne soit de Dieu? Mais inferer par là, que la medecine soit parfaite, & par consequent les Medecins parfaits, il ne s'ensuit pas. Car encore que l'art soit parfait du dō de Dieu, maitre des sciences: ceux pourtant qui s'en meslent (& mesmement ceux qui en abusent ou par ignorāce grosse, ou par fine malice, cōtre lesquels seuls i'ay escrit) ne sont parfaits, ains bien esloignez de perfection. Et ainsi en est de la medecine

comme des autres arts, lesquels iacoit que parauenture ils soyent parfaits: les ou-
riers toute fois ne le sont pas, & s'en est
peu ou point trouué: ains on les a presup-
posez & feints, non tels qu'ils sont, ne fu-
rent onq, ne seront: mais tels qu'il les con-
uiédroit estre selon la perfection de l'art.
Et en ce que pour exemple de medecins
parfaits Surrelh amene les Apostres, &
saint Luc, cela ne fait rien contre moy ne
mon escrit. Car en iceux c'estoit miracle
& don de grace: nō art acquis par estude,
labeur, inspection, & exercitatio. Et pour-
ce à cela ie responds, comme Platon au
fixieme liure de la Republique, que i'ay
leu en allegation dens vn liure François,
disant ainsi: *Je parle des choses humaines mon
amy, & tousiours excepte de ma disputation la diui-
ne parole.* Le semblable aussi dit Homere
en vn demi vers, comme ie l'ay leu en la
translation François de M. Salel. les-
quels passages si Surrelh auoit bien leuz
il ne farciroit point son Apologie de tant
de lieux de la sainte escriture bigarrez de
Latin en François, impropres à ceste di-
sputation medicale, mal accommodez, &
violentement à cela tirez: mais il ne fait
que

que ceste seule chanſon, ou bien il le fait pour ne receuoir point de cōtrecredit, attendu que diſputation Theologique eſt perilleuſe. Et pource que aux preſcheurs (diſent bien ou autrement) on ne leur reclame point, il s'arme de celle autorité. Quāt à ſaint Luc, qu'il produit pour exemple de parfait medecin, il eſt appelle de ſaint Paul treſcher, & nō treſparfait medecin. Parquoy tels exemples eſtranges du propos ne font rien cōtre moy, & montrent l'affectee vanité de l'allegateur.

Ite per vniuerſum mundum, &c.

Vela vn entreieēt de Latin fort biē mis à propos, pour prouuer la perfection de medecine naturelle, par la predicatiō euāgelique, & ſignes ſupernaturels des Apōſtres & diſciples de Ieſuchriſt: qui guerifſoient les malades, non par l'art de medecine, ne par ordonnances, ne par ſimples, ou cōpoſez medicamens, mais par ſeule parole, & impoſitiōs de mains, ayāt vertu diuine, ſans art ne ſcience humaine, Pour ce mal à propos.

In omnem terram, &c.

Encore pis. Regardés comment il ratiocine à la positiō de la miraculeuse guérison des Apostres, pour la testifier auoir esté par tout le monde, il accouple en asomption l'harmonie vniuerselle des Cieux & corps celestes testifiāns la gloire de Dieu, desquels expressement parle en ce lieu le Psalmiste, qui fut plusieurs siècles deuant les Apostres. Sinon que par aduenture (cōme il est prescheur) il vueille allegoriser en sens anagogic, les cieux pour les Apostres. Et biē soit. Encore n'en peut il former que vn syllogisme inconsequent bigarré & moins bien par luy digéré en telle sorte:

Les Apostres mettront les mains sur les malades, & ils s'en trouueront bien.

Le son de la parole d'iceux (ou Cieux propremēt, ou Apostres allegoriquemēt) resortit par toute la terre. Parquoy par tout le monde (conclud-il) y a eu gens qui ont eu parfaite cognoissāce de medecine. Regardés lecteurs Philosophes, quel syllogif

logisme in Barbara: & comme il est bien basti d'arene sans chaux, auquel n'y a nul moyen gardé, commençant par l'imposition miraculeuse & diuine guerison des mains Apostoliques, puis moyennât par le son des Cieux, ou allegorique predication des Apostres: Et de là concluât la perfection de sauoir en l'art de medecine auoir esté par tout le monde. Proposant la diuinité, & cōcluant en l'humanité. Quel argut maistre és ars passé souz la cheminee! qui par tel syllogisme infere (si Dieu plait) ma malice & ignorāce, ou il descouure la sienne. Parquoy au contraire ie cōclu que ceste trainee d'argumens Theologiques mal enchainez, ne rabat en rien ma positiō, que ie soustien, & dy la medecine (i'entens humaine & practique) n'estre parfaite, ne les medecins icelle practiquans: mesmement les ignorans & abuseurs, cōtre lesquels i'ay tousiours protesté auoir escrit.

*Et puis que tu te mesles de vouloir
montrer l'office d'un medecin, &c.*

Fausse attribution. Car ie ne me suis point meslé en mon liuret de mōtrer l'of-

fice d'un medecin: mais les abus des ignorans medecins. Pource sur cela la conference des maitres aux disciples, & des disciples aux maitres, entrebrisees des sentences Latines de saint Hierome, & de l'euāgile, est absurde & impertinēte: tant pource que ces passages parlent de la maistrise & discipline de la science diuine, & des saintes lettres, & non pas de la medecine, ou il les tire à gueule torse, ainsi qu'il fait par tout. Comme aussi, pource que ie ne recognois les medecins pour mes maitres, non plus q̄ eux ne me recognoissent pour leur disciple. Car l'apprentissage de Pharmacie (qui est mon estat) se fait chez les maitres Apothicairés tractās manuellement, visiblement, & realement les medicamens, & les dispensans & administrans: souz lesquels i'ay appris mon art, & les recognoy volontiers mes maitres, non pas chez les medecins, qui donnent paroles, & ordonnēt le plus souuent verbalement, ce qu'ils ne cognoissent realement, comme tous les iours & toutes les heures on en peut faire preuue presente, en leur montrāt vn ou plusieurs simples, & leur demādant si c'est de cela qu'ils ont ordonné

ordonné, & là on les verra ou ignorer, ou doubter: n'entendant pourtant de leuer l'honneur à d'aucuns bons medecins, qui à l'estude interieure des paroles, ont adioint la cognoissance exterieure des choses. Mais de tels ne s'en treuve pas souuēt treze en la douzaine.

Ausquels tu dois honneur & reuerence.

A' cause de quoy ce debte? Honneur au Roy, reuerence à la Royne apres Dieu.

T'oyesmeu de mauuaise & pernicieuse enuie &c.

Ce n'est point enuie de moy, mais auarice de ceux qui entendent plus à curer les bourses argenteuses, que les corps malades: disans à l'entree en tédant la main, Or ça mon amy: & à la sortie apres auoir mis en gibeciere: Or bien mon amy: Vous vous porterés bien, si Dieu plait: vendans ainsi à pris de l'or leurs paroliers oracles. Au nombre desquels Surrelh voudroit bien estre, plutoſt que de mettre peine & estude d'estre au nōbre des Syluius, Fernel, Braillons, & tels rares archiatres.

Pour

*Pour trente escuz, & en trois ou quatre
ans on peut faire vn Apothichaire, mais
vn medecin, &c.*

Tout le monde fait le contraire de ce-
lai Et que les docteurs des vniuersitez, ne
sont point si tyrans & iniques extorsion-
neurs de cinq cens escuz pour le degré:
ne les estudians en medecine commune-
ment si riches ou prodigues que d'em-
ployer cinq cens escuz à se graduer: veu
que pour la plus grand part ils sont au cō-
mécemēt de basses facultez, cerchāsceste
brieue voye de s'enrichir par nues paro-
les ou escrits, & aueugles hazardemēsdes
vies humaines perillees impuniment:
Ioint, que de ces hazardeux practiquans
les plusieurs n'ont point de degré, & ne se
soucient d'en auoir: mais bien plutoſt vn
vestment de foye, & vne formalité de re-
cipés, qui est vne abbreuiation de tous de-
grez sans cinq cens escuz. Et vouldroye
bien demander à Surrelh qui se dit mede-
cin, si son degré luy a cousté cinq cens
escuz. Lesquels s'il auoit, ie croy qu'il ne
les y emploieroit pas: mais bien plutoſt se
aduenturerait à vne impudente & effron-
tee hard

tee hardieſſe de ſe dire medecin(comme
ia il cuide faire, ſans degre ne qualite)
pour les gaigner à gaing de boucher, de
tuer pour viure. Mais Dieu gard les mala-
des, de ſes ordonnances.

*A paris & à Lyon s'eſt trouué Apo-
thicaire auoir fait parties de trente ou
quarante eſcu, &c.*

Ce n'eſt euangile ne Bible: il ne le croit
qui ne veult. Mais encore qu'il ſoit croya-
ble, il n'eſt pas hors de raiſon. Car pour
vne ou deux viſites & ordonnances de
medecin, ne cōtenant que parolles, l'apo-
thicaire peut auoir employé vacation de
quarante iours & nuyets ou plus, veilles
intempeſtiues, labeurs de ſon corps, con-
tinuelle aſſiſtance de ſa perſone, intereſt
de ſes propres affaires, deſpēſe de ſes tres
cheres drogues, iuſques à l'or, pierreries,
que Surrelh approuue, ambres gris, baul-
mes, & telles choſes precieufes, leſquelles
meſmemēt vont de ſon propre chatal, ou
le medecin ne fournit pas ſeulement vn pe-
tit morceau de papier, ou il eſcrit quel-
que nombre de ℞. trenchees, de 3. dou-

blees & de paroles troubles. Parquoy comme cecy n'est incroyable, aussi n'est il desraisonnable. Outre ce que le medecin pourroit bien auoir esté si peu auaricieux (qui ne se croit pas legierement) ou amy, que de se contenter de moins du douoir.

Medicus non recedet de domo magnatum absque magno munere. Tu aurois bons yeux, &c.

Ie respon que ce passage a esté aussi bié dit des Apothicaires, voire encores des Chirurgiens; que de ceux qui aujourd'huy par honneur vsurpant du moins penible se font particulièrement appeler Medecins. Car en celuy temps, & apres, la Chirurgie & la Pharmacie estoient parties de la Medecine. En outre, ie laisse à dire q'en ce lieu de l'Ecclesiaste Salomon se moquant des vanitez du monde, reprent l'auarice des medecins, qui ne veulent departir des grosses maisōs sans auoir main d'argent, & poulce d'or.

Nemo præsumitur inmemor suæ salutis æternæ.

Vela

Vela craché du Latin bié à propos. Mon dire est, que les Medecins (presupposez ignorans, & abuseurs) se soucient moins de la santé des malades, que de gagner argët: & il respond en droict, que nul n'est presumé oblir son salut eternal. Ainsi au propos du salut du corps il respond du salut de l'ame, & de la santé charnelle, il equiuoque à la felicité eternelle, par vne regle de droict, qui ne se trouue point au tiltre par luy allegué, & neantmoins par deux ou trois telles faulses ou impropres allegations, il pense bien se montrer aussi bõ legiste, q̃ theologastre. Quel ardelion!

*Tune deuois parler contre vne si grande multitude de gens sauans, mesme-
ment fideles.*

Il fait deshonneur à l'ordre: disant si grande estre la multitude de ceux contre lesquels i'ay parlé. Or n'ay ie parlé que contre les ignorãs & abuseurs, desquels ie ne pensoie le nōbre estre si grand, comme il dit, accreu encore de sa personne, q̃ s'est senti attainte de la pierre que i'ay iecté au mylieu de celle trouppes d'igno-

rance abusive. Puis il adioust, *Mesmesment fideles: Qu'est ce à dire cela?*

Mais puis que tu veux apprendre à tirer les elemens d'un simple, apprens le de ton souffleur.

Faulse attribution. ou vainemēt il m'attribue, que ie veux appredre ce que ie say fort bien long temps y a, & n'ay que faire de l'apprendre d'autrui, ne du souffleur qu'il m'impose faulsemēt. Car ie ne say qui est ce souffleur. Mais il fait comme le factice Hercules, qui luy mesme se forge des monstres faux & foibles: pour puis apres aisement les defaire, & en telle sorte montrer sa vaillance. Ainsi Surrelh en maints lieux me forge & attribue de faulses positions, pour les rabbatre puis apres à sa mode, comme ceste cy: Que ie veux apprendre à tirer les elemens d'un simple. Ce que ne se trouuera par moy ne dit, ne escrit, non plus que plusieurs autres, que faulsemēt & feintement il m'attribue. Car ie n'ay point de souffleur, & encore moins vse de serpentine vinaigriere, qu'il me forge, & si ne
veux

veux apprendre l'extraction(que assez ie
 fay)ne de souffleur ne de luy,ne de ses Sa
 ladins,bons Lombars,Grands Bernards,
 Coutel de Treues,& autrestels Barba
 res,& imposteurs alquemistes,faux vsur
 pateurs du nom de Philosophie. Des nōs
 desquels il se brauade en parlant des di
 stillations,en telle sorte qu'il se montre
 n'y entendre rien,& en parler comme
 clerc en armes.

*Il y a plusieurs qui les tireroient mieux
 que toy,s'il leur seruoit en quelque chose:
 mais ils sont si raisonnables qu'ils se con
 tentent de ceux qui furent extraits à la
 creation du mōde par le grand Artiste.*

Patrocination de paresseuse & grosse
 ignorance,qui ne fait & ne veut fauoir:&
 se cōtēte de sa bestise.Puis il appelle Dieu
 artiste par epithete autant barbare,cōme
 impropre.Car Dieu n'apprint iamais art,

Citius est coniungere,quàm diuidere.

A'quel propos est entremeslee ceste al
 legation?& qui en parle?ou qui la nie? Cō

bien que les Chirurgiens ne confesseront
 iamais qu'il soit plus facile de conioindre
 vne solution de cōtinuité, que de despar-
 tir le cōtinu. Mais Surrelh dira, qu'il s'en-
 tend des metaux, ou des extractions ou di-
 stillatiōs. Et bien soit; mais à quel propos?
 Car ie n'en ay dit ne le pro, ne le contra.
 Et cela est vne superflue extrauagance.

Quelque souffleur de trois cuictes.

Cuidant par mocquerie noter imperfe-
 ction, il adapte tiltre de perfection. Car
 trois cuictes font le parfait sucre, & trois
 cuictes au corps humain, font le parfait
 sang.

Au tiers chapitre du Techni.

En vn mot deux fautes. Car ceux qui
 entendent en Grec, auxquels ie me suis
 fait exposer les estranges langues en l'A-
 pologie François, m'ont asseuré que au
 mot titulaire de Galien la dernière lettre
 Grecque se tourne en Latin envn é long,
 & que la diction est du féminin genre. Et
 pource qu'il failloit escrire non du Te-
 chni, mais de la techne, ou plustost del'art,
 en bon

en bon François. Mais toutefois qu'il faut
disputer des choses, & ne s'amuser pas
aux mots, auxquels Surrelh n'auise pas de
si pres, qu'il n'y commette coup à quille
des incongruitez, & barbaries, combien
qu'il soit des bonnes lettres professeur:
mesmement és ridicules compositions du
Latin avec le François: comme en disant
apres leui ebullitione: de oleum absynthij
il eust trouué separatio puri ab impuro.
Regarde Magnus Mediolanensis, Tym-
paniste, Ascates & semblables asneries,
qui ne valent le remembrer.

Qui sont ceux qui ostent l'air aux malades.

Ce sont ceux que en cela ie repren,
& auxquels ie l'ay veu faire. Lesquels pour
l'honneur que Surrelh dit que ie leur doy,
ie ne veux nommer. Et sans cela, les mala-
des qui ont souffert ceste reclusion (s'ils
en sont reschappez) les cognoissent assez,
& en cest article, ne eux ne Surrelh, ne
me sauroiét prouuer que ce soit bien fait,
d'enclorre l'air, ne contredire que le bon
air n'ayde à la vertu expulsive.

Ex pot

Ex potione aquæ frigida sapiſſime febris curatur.

Cela fait pour moy, qui dy qu'on ne doit faire mourir de ſoiſ les febricitans, pour trop obſtineemēt leur oſter le boire.

Et quant à l'eau que tu dis n'auoir point de difference de la cuiſte, & ſublimee, à la courante naturelle &c.

Vela vne autre faulſe attribution. Car ie n'ay dit ny eſcrit de l'eau cuiſte, & ſublimee, mais ſeulement de la cuiſte ay parlé en ceſt endroit, eau naturelle, boillie: Et en vn autre endroit ay parlé des eaux ſublimees & artiſcielles extraictes d'autres matieres q̃ d'eau. Car ie ne ſuis pas ignorant q̃lle differēce il y a entre l'eau cuiſte ou boillie, q̃ eſt naturelle, & eau ſublimee qui eſt artiſcielle. Leſquelles icy Surrelh conioint & confond enſemble, & faulſement veut donner à entendre, & me met à ſus que ie l'ay ainſi fait, pour me braſſer calomnie, & forger faux moyen à me redarguer à ſa mode. Mais ie ne ſuis pas tāt oblieux de moy meſme, que ie le laiſſe paſſer à

fer à sourde oreille. Parlant donc en cest
endroit de l'eau cuiſte, & boillie, i'ay dit q̃
l'eau cuiſte & boillie n'a point de differēte
qualité, ou faculté à l'eau viue & courāte,
& pour eſtre boillie ne ſe ſubtiliſe ou amē-
liore point: ains plutoſt ēpire, & ſe engroſ-
ſit pourautāt. q̃ par la force du feu le plus
ſubtil ſe exhale en vapeur & fumee, & le
plus groſ & terreſtre demeure, comme on
le peut cognoiſtre aux ſentimens de l'œil:
qui la voit moins claire, du gouſt, qui la ſa-
uore moins bonne, & de plus ingrate ſa-
ueur: & du poix ou plus legiere ſe trouue-
ra l'eau viue, & plus peſante l'eau cuiſte
& boillie, en egale quantité, & prinſe en
meſme puis, fontaine, ou riuiera. Comme
l'experience le mōtrera. Parquoy Surrelh
ne me ſauroit repliquer raiſonnablēmēt,
que l'eau boillie & cuiſte, ne ſoit plus ter-
reſtre, moins ſubtile, & pour ce moins vti-
le que l'eau viue en ſa nature. Laquelle
par eſtre boillie & cuiſte (comme le per-
uers Neron homme contrenaturel l'ai-
moit) n'aquier rien de bon: & ne pert ſes
qualitez naturelles de froid & humide.
Parquoy le Qui pro quo du grand Milan-
nois, que Surrelh penſe alleguer contre

moy, fait manifestement pour moy, disant que à faute d'eau subtile, la grosse sera rectifiée & subtilisée par decoction & sublimation. Car la sublimatiō de l'eau tire & eleue le plus subtil, qui distillé dans le recepvoir sert de viue, claire, legiere, & naturelle eau subtile. laquelle si on auoit, ne seroit besoin de sublimer la grosse trouble & pesante. D'ond il appert, que cest auteur estime tousiours la claire, viue, & legiere meilleure que la sublimée & distillée qu'il met en *Qui pro quo*, pour icelle. Car il est tout notoire que tout *Qui pro quo*, est mis pour autre chose meilleure: d'ond on ne peut finer. Et si ne parle pas de la decoctiō seulemēt, mais principalement de la sublimatiō, qui ne se fait sans coction. Parquoy ce passage ne fait aucunement contre moy en cest endroit, ou ie n'ay parlé que de l'eau cuicte, & non de l'eau sublimée. Mais d'auantage ce grand Milannois, que Surrelh cuidoit mettre en champ contre moy: se tourne de ma part, & bataille pour moy, tant en ce qu'il parle de la sublimation: qui tire & eleue tout le plus subtil de l'eau cuicte: comme aussi en cela qu'il met le *Qui pro quo* d'eau subti

subtilisee par sublimation, au lieu d'eau viue & naturelle, ou on n'en pourroit finer, qui seroit meilleure d'autant que vn vray est meilleur, que vn Qui pro quo: cōme son dict le donne bien à entendre, Io teregracio Signor Milanese.

Je te feray sublimer, chasser, & rendre passives cent liures d'eau pour vne liure de feu.

Qui a iamais leu, veu, ne ouy que le feu se peut peser? qui de sa nature tressubtile & treslegiere tend tousiours en haut, & fait toutes choses plus legieres. L'air ne se peut peser: encores moins le feu. Parquoy ie dy, que si Surrelh auoit en puissance tous les feux celestes, les feux etherains, & tous ceux qui sont au monde, iusques aux feux infernaux, si n'en pourroit il peser vne liure, nō pas vn scrupule, pour faire le miracle qu'il promet. Et pource il par le fort mal en Philosophe. Mais pour luy ayder, nous dirons qu'il entend vne liure de matiere inflammable, prenant ou contenant le feu. Prenne donq d'estoupes, ou pouldre à Canon, la mette en vne balance, & en l'autre la liure: puis y mette le feu & le pese, pour verifier son dire, de la liure

de feu, auffi ridicule que celuy qui auoit
vendu à arres receuës, & promis de liurer
vne liure de mousches, chose impossible,
& imprestable.

*Le souffleur qui t'a aydé, n'a pas bien leu
Raymond Lulle, ne maistre Arnould de
Ville neuue, car il eust trouué separatio
puri ab impuro.*

Le souffleur qui m'a aydé (puis qu'ainfi
le veut Surrelh) c'est l'esprit me inspirant:
qui a bien leu les auteurs sus nommez, &
les a trouué tels, que par le iugement des
bons & prudens ils sont estimez: c'est à sa
uoir, suspects, menteurs, imposteurs, & sin
ges de Philosophes, sous la couuerture de
quelques probables raisons Philosophi
ques, qu'ils mettent en montre & parade:
au demeurant reiectez hors toutes esco
les de Philosophie, & non allegables, sur
peine & honte d'estre siblez & pelaudez
au clac des mains. Et toutefois encores
sont ils mal amenez en ce lieu, ou n'est
encore question que de l'eau cuiète, non
des extractions, sublimations, & distilla
tions, dont sera question cy apres, & ou
ils

ils deussent auoir esté reseruez pour fortifier Surrêlh. Mais puis que icy ont esté trouuez, icy mourront.

Ie croy que cæcus cæcum ducit, &c.

Il retourne à sa prescherie iniurieuse. il se fault taire, ou dormir.

Est ce parlé en homme considéré, &c.

Est ce parlé en bon Orateur d'ainfi sauter du Coq à L'asne sans aucune liaison?

Ie te respondrois (Mais tu ne l'entendrois pas) que nostre seigneur a reserué sept mille, qui n'ont courbé les genoux pour adorer Baal.

La merueilleusemēt bōne & fort subtile exceptiō! l'ay parlé de l'argēt demādé p les medecins: & il me respōd de l'idololatrie des Iuifs & des refusans adorer l'idole des Assyriens. Vrayement ie ne m'esbahy pas, si tant arrogamment il dit que ie ne l'entendray pas, veu qu'il ne s'entend pas luy mesme. Cars'il s'entendoit bien, il ne

respondroit pas si absurdement. Mais il luy fault ayder, & dire que saint Paul a escrit que auarice est seruitude de idoles, & qu'il l'entend ainsi. Puis le vela sauué par les marescs.

Aristote tient que le Soleil, non est calidus nec frigidus.

Qu'il produise le lieu, & là sera trouué que ce n'est point Aristote en sa persõne.

Si tu estois capable de discipline, &c.

Dieu me gard de la sienne. Et toute fois icy il promet chose impossible, à peine de l'experience souz bonne gageure.

Je voudroie prier maistre Brallier de me faire l'huile de lateribus, sans huile d'olif: ou l'huile de Iacob sans cire.

Il ne fault point prier, mais seulement commander, en fournissant pour les fraiz & vacations, & enseignement de la façon: & ie extrairay en sa presence sans huile d'olif, ne autre quelcõque, c'est huile qu'il

qu'il appelle in son Latin farci, oleum de lateribus, voire huile de Talq, qui est plus sec & aride que tuyle, quarrō, ne brique, & pource qu'il vienne apprēdre en payāt, ou qu'il ne nie point ce qu'il ne fait.

Il feroit vn grand bien à vn nefretique de mettre deux ou trois onces de oleum absynthij ou rutacei à vn clystere, &c.

Oyez ce gentil Latiniseur de Oleum rutacei: comme il cuide me bastir calomnie, voulant donner à entēdre à ceux qui n'auront leu mon liure, que ie voudroie dispēser en clystere, ou autre administration, autant d'huile de simples extrait en perfectiō, comme d'autre huile commun embeu & confict à la vieille mode: ou au contraire. Mon dire est que de l'huile extrait en perfectiō, vne drachme fera plus d'operation que vne liure d'autre, & pour ce y en faudra beaucoup moins, pour la faculté & qualité d'ond est question, non pour la quātité, q̄ superfluemēt il allegue à rendre les clysteres onctueux. Car l'onctuosité pour laquelle il faut quantité en matiere de clysteres, n'a rien de commun à la fac

à la faculté & qualité des huyles distillees d'ondicy est questiō. D'ond il appert, q̃ ou par grosse ignorāce, ou trop sottie malice il me va chercher vn alibi foireux de quāti té d'huyle commun pour engresser clysteres, & lubriquer les boyaux: ou i'ay parlé de la faculté & qualité medicale des huyles distillees. Et m'en respond à la trauerse comme si tous huyles n'estoient applicables, sinon à rédre les clýsteres onctueux, & non à autres plusieurs & meilleurs vsages. Et en cela il suppose les nephretiques comme si les nephretiques n'auoient besoin que d'huyle clysterisé pour guerison. Vela vn fin Empirique.

D'ailleurs, si tu fais les huyles selon l'intention des Docteurs: & tu es bon apothicaire, ne le te fault cuire ne brusler (cōme tu dis) mais le tenir in ventre equino, in sole, aut in balneo Mariæ.

I'ay esté & suis tenu pour bon Apothicaire en noble & fameuse ville. Ces docteurs (à l'intention desquels il me veult assubiection) s'ils sont des Methodiques communs, ils n'ordonnent point d'huyle extrait du

trait du simple, mais du commun confict avec quelque simple, à quoy ne conuient ce qu'il allegue du ventre cheualin, du Soleil, & du baing marie: & ainsi il se contrarie. Et si ces docteurs sont quintessentiaux & extracteurs de propres huyles distillez, donq ils conuiennent avec moy, & moy avec eux. Pour lesquels huyles extraire ne fault point que Surrelh me cuide enseigner en son beau Latin entrelardé (ce qu'il estime bien braue, & eloquent, de dire moytié figue, moytié raisin: Il le fault tenir in vêtre equino, in sole, aut in balneo Mariæ, & apres leui ebullitione) Car cela est le vieux ieu. Nous sauons d'autres calorifiques meilleurs, plus egaux, & tempez: que Surrelh ne fait pas, pour extraire ces bons huyles distillez des propres simples, avec lesquels se fait operation plus brieue, plus seure, & meilleure, que avec ces huyles d'oliue destrempez & conficts à la mode cōmune avec les simples, pour en cuider attraire la qualité, qui est vn manifeste abus. Car l'huyle d'oliue ne conuient de sa nature à toutes sortes de medicamens, & par infusion de quelconque drogue, plante, semence, herbe, ou racine,

il ne s'altere point en autre vertu que la siéne naturelle, & ne se adioint à ce qu'on luy a adposé. Car les choses crasses & oleagineuses, ne se meslent ne incorporét en substance & vertu avec les liquides & aqueuses: ce qu'est impossible pour leur cōtraire diuersité. Et quant à ce, que pour prouuer la consubstantiation de l'huyle avec les simples, qui luy sont adioincts, Surrelh amene en tesmoignage l'huyle De cottonis (comme il parle) qui sent les coins. Vela vne belle preuue: il en a l'odeur, donq il en a la substāce & vertu. Vn mignon sent la ciuete, ou le musc: donq il est transformé en ciuete, & en musc, ou en leurs facultez. Vn hacquebutier sent la pōudre à canon: donq il est trāsnué en icelle, & deuenu chauld & sec, flatueux & bruslant. Voyla bien subtilement argumenté de la qualité voire externe, à la substance. Quel dialecticiē & physicien! Et s'il veult argumenter par les effectz, disant que de tels huyles composez, l'operation s'en ensuit selon la qualité du simple qui y est mis: ie dis que ie n'ay poit veu faire ces miracles. Ce que j'ay bien veu des huyles extraits. Et quand bien encore se

feroient

feroient tels effectz, ce feroit par la vertu & substance du simple infus, non de l'huyle. Parquoy par plus forte raisõ l'huyle propre extraict du simple fera beaucoup meilleure operatiõ, & plus seure, que cest huyle commun composé. Ce que ont approuué, & approuuent tous les iours les bons Chirurgiens, qui en diront comme moy. Et qui dit le contraire comme Surrelh, ny entend rien, ou dement son saouir. Et si est vraysemblable que les bons anciens Medecins quand ils prescriuoient les huyles avec denominatiõ de quelque simple, ils entendoient non l'huyle commun destrépé avec le simple: mais le propre huyle extraict, ou produict du simple mesme cõme par bonne ratiocination de plusieurs passages, il se peut colliger. Lesquels si Surrelh auoit bien leuz, & entenduz, il se fust desporté de publier si clairement sa non sauance, ou malignement contredire à verité.

Si tu eusses veu Auicenne au chapitre de cessione, tu eusses peu escrire comme tous huyles sont contraires aux playes fresches, ou les nerfs sont descouuers.

A quel propos ceste extrauagãce, d'ond ie n'ay eſcrit ne le pro, ne le contra? Mais il n'a leu que cela d'Auicene, & peut eſtre encore que nō, mais il a voulu hors de propos donner à entēdre qu'il l'auoit leu. Et bien que m'emporte cela?

Si tu veux dire absolument que la coulpe est des medecins en les iulletant, &c.

Croyez ce preſcheur qui s'arme d'iniures ſans raiſon, ne verité, ſans cognoiſſance de ma perſonne qu'il iuge (iuge incōpetant) ſans cognoiſſance des faiçts & des euenemens, qu'il n'a veuz ne ouyz. Mais ſi ont bien les maiſons ciuiles, & familles de Lyon, & autres villēs: qui tous les ont veu languir & puis mourir de ſoiſ par ſiniſtre ignorãce ou hoſtile malice d'aucuns medecins praçtiquants auant que ſauoir, & puis eſtudiants en Grec & Latin, quand ils ſont ſauãts en eſcuz, aux deſpens de la vie deſhommes. Tels exemples ay-ie bien veuz. Mais les morts qui plus ne mordent ſe taiſent de l'outrage à eux faiçt. Ce que ayant veu par tant d'euenemens, nō ſans grande cōpaſſion, ie deſireroie vne Ordō
nance

nâce royale biẽ cõstituce obseruee, & gar-
 dee: qui commãdaſt aux Medecins decla-
 rer la maladie des patiens qui leur ſeroiẽt
 baillez en cure. Et s'ils venoient à mourir
 entre leurs mains, faire ouurir les corps,
 veoir les parties mal affectees, & icelles cõ-
 ferer avec leurs iudications & ordonnan-
 ces. Et là verroit on à l'œil & au ſens, la iu-
 dication & ordonnâce toute cõtraire à la
 maladie, & leur trop hardie & hazardeu-
 ſe preſomption ſur vn tel ſubiect que le
 corps humain. Mais pour toute excuſe ils
 diroient (ce que couſtumieremẽt ils font)
 que c'eſt vn ſymptome (comme ils Greci-
 ſent en François) qui eſt entreuenu. Et
 que la maladie eſt bien curee, mais le ma-
 lade en eſt mort. Mais de tout cela ne ſe-
 ra rien. Car les tombeaux, & terres des
 cemetieres couurent leurs erreurs, &
 fautes mortelles. Et puis, comme dit l'Ita-
 lien prouerbe, *Homo morto non fa mai guerra.*

Te diſant plus ſauant que Aſculapius.

Je n'ay point dit cela: & faulſement (à
 ſa mode) il le m'attribue. Car ie ne ſay, nõ
 fait il pas luy, qui eſt, ou qui fut *Æſcula-*

pius, sinon en poësie, dont nous ne disputons pas.

Hippocrates in prologo, &c.

En cest endroit il mōtre biē qu'il a mal leu, & encore pis entendu Hippocrates.

Lesdits Seigneurs medecins seruans domicilement le Roy, sont comparez à vn Duc, ainsi que dit Bart. &c.

L'Ardelion! qui contrefait le legiste, avec son domicilement: & allegue vn sommaire pour le texte expres qu'il desguise, & interprete vn Duc (qui est nom d'honneur, & de principauté, n'eschéant point en Medecins) pour vn Capitaine, qui est nom de charge, & d'office militaire, auquel l'Empereur egale non tous ses medecins le seruans domicilement (comme il dit) ou plustost domestiquemēt: ains seulement les principaux, que par nom Grec il appelle Archiatres. Et encores souz certaines conditions qui ne sont en tous Medecins Royaux: lesquelles ce iuriste iniuriste omet, ou ne les a pas leües se cōtentant du sommaire Bartolin. Ce que ie respon n'est

ſpon n'eſt pour deroguer aux bons medecins du Roy, que ie reuere & hõnore pour eſtre tous autres q̃ Liſſet ne Surrelh medecins maſquez: mais pour donner à cognoiſtre comme aſnierement ce maitre Aliborũ fait auſſi bien du Iuriſpet en loix, comme du preſcheur en Theologie. Et en cuydant faire oſtentation de diuerſe lecture, il deſcouure ſon ignorance.

Et quant au veloux, ie ſuis d'aduis, &c.

Vela bon aduis de fol: & bonne ordonnance de tel medecin, qui nous ordonne des chappeaux verds comme s'il eſtoit Pape ayant uiſſance de nous faire Patriarches: & en outre nous ordõne de ſonnettes, que nous luy remettons volontiers, voire les gros grilletts, cāpanes, & tabans des grands aſnes d'Auuergne: appartenātes à tel diſputateur qui pour bons & ſolides argumens, & fermes reſolutions, produit telles folies ridicules, ou vilaines iniures: ou quand il eſt au bout de ſon rolc, & qu'il ne fait que dire, il me preſche (le venerable) & met en auant la perſonne de Dieu, qui n'entre en diſpute (comme
dit eſt

dict est) & s'en ayde au besoin en defaule d'argumens, comme les Tragicques font des dieux de machine: ne se pouuāt autrement expedier des difficultez ou impossibilitez de resoudre. Vela grand finesse.

Si tu eusses versé es lettres humaines, tu sceusses bien quic'est qui a dit, Ego cūm homo, &c.

Je cognoy bien qu'il a versé, & biē lourdement tresbuché en ce passage, qu'il destort à la condition humaine subiecte à maladies, & à la mortelle necessité des hōmes: ou le vieillard Comic parle des negoces domestiques, & affaires communs, & mutuel ayde de voyfin à voyfin: ainsi que tresbien le m'a autresfois interpreté au college mōsieur maitre Jean de Canapes (que pour honneurie nomme) pour lors mon principal precepteur, & instituteur de la ieunesse Lyonnoise; & auiourd'huy l'un des plus renommez medecins de Lyon. Or considérez comme cest impudent, trauerse, & deprauē à sō abus toutes escriptures saintes & prophanes, preiugeant par trop temeraire presumption les lecteurs

teurs bien bestes, en estimât qu'ils ne cognoitront point tels trauersemens, dctor
sions, & deprauations.

*On saura si ta pratique vaut mieux
que celle de Aesculapius, Virgile, ou,
Nostradamus.*

Les vela bien assemblez en fricassée de
pratique, vn dieu fabuleux, vn Poëte ou
magicien, & vn deuin. Que veut il dire?

Et tu n'es pas bon grimaud.

Pourquoy donq me brouille-il tant de
Latin, si ie ne suis grimaud (qu'est à dire
Grammarien en son langage) Il faut dire
que c'est affin que ie ne l'entende point,
qui ne suis pas Grimaud, & par ce moyen
ie ne luy puisse respondre. Me vela prins,

*Ces deux ars sont si ioincts, que l'un pour-
roit faire l'autre.*

Accordez ceste verité, à la mensonge
superieure, ou il a dit la Pharmacie estre
trop mechanique.

Ny vn tas de Iarretiers de village, porteurs de bourses, & de clysteres à leurs ceintures.

Il souuient à Robin de ses fleustes. Il fait comme se gouuerne ce mestier. Et pource par son propre edict luy mesme se bannit de l'ordre des Medecins comme Iarretier villageois.

Lesquels sont de ceux que dit Franciscus à sancto Nazario, Medici imperiti &c.

Il n'allegue iamais que ce saint Nafard qui est vn de ses euangelistes. Et luy attribue ce prouerbe du collyre appliqué à toutes maladies: lequel n'est pas de luy, mais de saint Hierome en l'exposition de l'epistre aux Ephesiens, qui l'a escrit long temps auant que Misser de sancto Nazario fust né. Mais il luy est à pardonner, il l'allegue dond il la leu, ou ouy dire.

Il seroit besoin & utile, que &c.

Il parle à cheual le pouure pieton: & parle bien, & deüement en cest article.

Mais neantmoins contre foy & son non-
fauoir. Car si telle ordonnance fust, Sur-
relh eust esté à la famine, ou contreint de
exercer autre art, que celuy d'ond il ne
fut, ne doit estre, ne sera gradué pertinen-
ment. Mais vela: les malades de corps, ou
d'esprit tousiours demandent ce que leur
est contraire.

*Ainsi que disent les legistes, Medici
imperiti, &c.*

A cest article, & aux autres suyans de
mesme teneur: encore q̄ en deux ou trois
lieux ce nouveau Alciat allegue faux, &
par cœur à sa mode: si est ce q̄ ie n'y vücil
cōtredire. Car il n'y a riē cōtre moy: mais
diametralemēt contre les Medecins: les-
quels il declare par le droit estre meur-
tries & destructeurs des Republicques. S'il
dit parler des nō -sauans: aussi fay-ie. Puis
dit & preuue par les legistes (cōme il dit)
que toute persōne peut estre medecin, voi-
re les sages femmes releuās les enfās nez,
voire encores ceux qui curent les bestes,
à son dire, & preuue de glose qui gaste le
texte: en quoy il verifie le commun vers
prouerbial:

*Les Medecins & mareschaux,
Tuent les gens & les cheuaux.*

Vela l'honneur que fait aux medecins ce grand leur patrocinateur, & seul bouclier Surrelh, sans l'interuention duquel, ils estoient à honte.

N'as tu pas oy dire &c.

Non, Je ne l'ay pas ouy dire: ne veu, ne sceu, aussi n'en est il rien.

*La Mente, & Malice fault prendre en
ton iardin.*

O les elegantes & argutes allusions de nom Mente herbe à menterie, & de Melisse à malice ! Les vieilles les appellent ainsi en son village, & en font de telles elegances de noms prochains. Regardés le bon esprit,

*Nostradamus des propheties,
Toy & Lisset de grands folies.*

Qui eust pensé que vn si excellent pre-
scheur Theologien, Medecin, Phycien,
Legiste, Philosophe Quintessential, des
bonnes lettres professeur, fust encore de
surcrois

surcrois si bon rimeur en François? vous le voyez en deux vers, comme Virgile fut cogneu en vn distique. Que voulés vous? cest vn Hyppias Platonique: qui tout scet: ou plustost vn Ardelion de Martial, qui est tout, & de tout rien.

Et si d'adventure tu veux dire qu'il n'y a point de raison: ie te dis, que Sunt multa quæ occultam à Deo rationem habēt, quæ non cadunt in ratione.

C'est bien respondre. Vela le pont aux asnes: vela le refuge, & derniere frâchise d'ignorance, que de dire que ce sont les secrets de Dieu cachez, quand ils sont negligemment cherchez, & pour toute resolution dire, Non cadunt in ratione: c'est Latin aussi congru, que la raison cornue.

Je suis d'aduis que ailles chasser aux elephans, & que tu apportes les iambes.

A quel propos ceste sottise extrauagance, d'ond est nulle parolle? Quand i'aurois à chasser aux elephans, en consideration de tresgrande beste: ie lascheroie les chiës

apres Surrelh, qui m'amene les elephans
sans propos.

Si tu auois veu Gourdon, Maistre Pierre.

Grand mercy Iean Surrelh ! me vela
maistrisé autentiquemēt, & gradué sans
qu'il m'ayt costé cinq cens escuz. Et si ay
veu Gourdon, aux paroles duquel ie n'ay
pas si obstincement iuré, que pour meil-
leure raison, ou experience ie ne le laisse
pour le mieux. Car ami Gourdon, verité
plus amie, mesmement probable par rai-
son & experience. Et pource ie me ar-
me de l'autorité Fabiane disant, A celuy
qui a raison, il est libre & loysible de dire,
mesmemēt contre les persuasions, & opi-
nions desia receües. Et pource ne Gourdo
ne Surrelh, ne me seront en si grande au-
torité que de me faire acroire leurs mira-
cles cōtrenaturels des cendres de lieure
sans meilleure raison, ou demonstration.

*Puis que tu veux t'entremesler de me-
deciner, appren cela de moy.*

Sus, qu'on apprenne de ce docteur, qui
a bon besoin d'estre luy mesme apprins &
enseigné

enseigné, s'il n'auoit l'esprit indocile, & rempli de faulſe perſuaſion de ſoy meſme & de vaine oſtentation.

*Parquoy te fault croire que les cendres de
engendrent ſang.*

Croyez ce porteur. Mais Epicarme le me defend. Et auſſi n'en eſt il rien. Car de cendres qui ſont ſeches ſans humeur, ſuc, ne ſueur, ne ſe fait point de nourriture, ne par cōſequēt de ſang, & encore moins d'eſparme, qui ſe multiplie par humectation, ou la cēdre deſeche. Et pource en diſant:

Et ſi d'aduenture il eſt ainſi,

Il argumente formellement. Car de telle cōdition aduentureuſe, ou propoſition impoſſible, s'enſuyt ce qu'on veult: mais touteſois faulſement. Car de faulſes premiſſes faulſes cōſequences, & cōcluſions: cōme la ſienne, laquelle neantmoins il ro-
bore d'vne autorité nō autentique de ſon Alchimifte Bon Lombard, diſant en ſacheuille de Latin, *De omni re incinerata vitrum efficitur.* Dond il ratiocine le plus impert

impertinemment du monde par telle forme: La cendre de lieure engendre sang & sparme: Car de toute chose reduite en cédre se peut faire verre. Vela vn bon Enthymeme du verre au sang. Il est bien mieux argumeté de faire vne induction, ou vn Sorit du verre au pot, du pot au vin: du vin au sang, du sang à l'esparme: puis que de vitrification il vouloit inferer sanguification.

Deus de terra creauit nobis medicinam.

Quelle destorse descripture! Ou l'Ecclesiaste parle des medicamēs vegetatifs qui tous naissent de la terre, ou des choses viuās en terre il le peruertist aux pierres & mineraux: comme si rien n'estoit dit de terre, sinon ce qu'est caché es entrailles de la terre. N'estoit-ce pas malignement destourné le sens, & sur cela encor plus malignement me supposer impieté?

L'or croist en la terre comme si font les pierres.

Si croistre, est prendre primitiue creation, bien cela: mais autrement non. Car que nul homme en ayt iamais peu auoir, il n'est probable par quelcōq' autorité sās raison necessaire, mesmemēt de tels auteurs

nor

non receuz, comme son Raymon, Platier
Guiner, Lôbard, Bernard, & toute celle
eschole de souffleurs de mensonges, des-
quels on peut dire le vers Horatian,

*Les creux soufflets de ceux qui mentent
Enormes mensonges esuentent.*

Lesquelles mensonges ils adombrent
d'obscures paraboles, que ie n'enten pas
(dit Surrelh) Mais si fay trop pour eux &
luy: & respond que en fait clair & experi-
menté (côme du gal) n'y a point de para-
bole, & ce que dit Saint Hyreney: Suspe-
cte soit toute escripture qui du sens com-
mun s'esloigne, souz couuertures d'estra-
ges mots, & faits miraculeux.

*Je te rendray or liquable sans retour à sa pre-
miere dureffe.*

Il ne me le rendra pas, car ie ne luy
prestelay pas. Et aussi ne le sauroit il faire
mesmement pour medicamēt. Car l'or ne
se peut resoudre que par eau fort, qui ne
peut entrer au corps humain pour medi-
cine, mais pour certaine & angoisseuse

douleur.

*Tu dis qu'il ne creint autre element que
le feu.*

C'est faulſement mis à ſus. Ains ay dit
le contraire teſmoin mon liure: c'eſt à ſa-
uoir que l'or ne peut eſtre alteré par feu.
parquoy il ſe deſment & no n moy.

*Je t'en rendray quatre onces pour vingt es-
cu^x ſeulement de fragmens.*

Je n'achepte pas ſi cher l'huyle extraict
d'autre huyle ou les pierres ardentes ont
eſté eſtainctes, & embües. Car Surrelh ne
fait autre mode de tirer huyle des pierres,
à peine de bonne gageure à l'expe-
rience.

*Argentum detentum in ore, ſedat, & extin-
guít ſitim.*

Ceſt du Latin auquel ie reſpon que at-
traction de ſaliue, qui eſt cauſée par cho-
ſe ſolide & freſche miſe en bouche e-
ſtainct

stainct la soif. cōme vn caillou, vn noyau de fruiet, vne piece de fer, d'argent, ou autre metal: non par la vertu de la substāce, mais par la saluē attraiete: cōme appert és mors des mules bauantes en rongant leur frein, qui n'est pas d'argent, mais de fer: & neantmoins leur tient la bouche fresche.

*Et si l'aymāt attirer à soy le fer, le Karabe
& Gagathes la paille, qui sont choses
pesantes, L'vne & l'autre legiere, pēs-tu
que au corps humain & c.*

Double menterie & cōtradiction à soy mesme disant que le fer & la paille sont choses pesantes, & puis, l'vne & l'autre legieres. accordez ce beau langage d'hōme qui se dit des bōnes lettres p̄fesseur. Et apres conclut que ces pierres (car pour pierre il prent le Karabe q̄ est gōme) sont le mesme effect au corps humain. Oy, si le corps estoit de fer ou de paille. Et encore puluerisez n'auroient aucun tel effect

exterieur en fer ny en clou, en paille ny en foin. Parquoy moins au corps humain ou ils ne sauroient entrer entiers, n'y en leur simple substance. Considérez donc quel friuole argument: *olum est nutrimentum*. *Omnia volatilia pauci sunt nutrimenti.*

Aussi és restaurans ne se cherche pas la quantité du nutriment. Car si ainsi estoit, on les feroit d'un porc, ou d'un beuf: mais on y requiert la bonté exquise: qui ne laisse pas d'estre en la paucité des chairs volatiles. Pource est impertinente & superflue ceste allgation.

Vn enfant né auourd'huy à faute de chaleur suffisante, ne se peut soustenir sur ses membres.

Telle impuissance ne prouiét pas à faute de chaleur naturelle, de laquelle l'enfant a plus en son enfance, qu'il n'aura iamais en apres. Car elle luy est ingenite, cõe Hippocrates mesme en Grec l'appelle: mais telle impuissance prouient de mollesse, & trop grande humidité, cõe tresbien l'ont dit les souuerains medecins, nō pas les Alchemistes.

chemistes. Et en cest endroit il amene bié à propos vn allegoric passage de S. Paul, parlât de la pasture de l'ame, & il le cõtourt ne à la nourriture du corps, par sa coustumiere thcologastrie.

Bien est vray que tant plus vn pet.

Ho le vilain! qui cuide plaisanter puantement sur la vilannie. Fy, Il a apprins ce ste scurrilité en vn passage de Passauant.

Tu n'as pas bien fait l'experience, & moins leu les bons auteurs.

I'ay leu les bons & les nō bons auteurs desquels Surrelh m'amene vne caterue de farmee de raison, & allegue des Aphorismes, qui ne se trouuent point, & parmi entrelarde l'Euāgile à sa coustume. Et ay bié fait l'experience par plusieurs & diuerses fois. laquelle trespertaine me garde de croire les moins certaines raisons, autoritez, ou particulieres psuasiōs des auteurs qu'il me met à l'encōtre. tenāt assuremēt q̄ le vin nouveau de la mesme annee, bien purgé, ayant bouilly, & rassis, & pur, a plus de chaleur que le vieil suranné de deux, trois ou quatre fueilles: duquel la chaleur (cōe la plus subtile qualité qui soit au vin) s'est euaporee, & le vin deuenu vapide.

Ce que confessent les bons grumetz & vinatiers, & sommeliers qui disent d'un vin vieil, qu'il a mangé sa mere, quand il a expiré sa chaleur. le maintien donq que le vin nouveau (comme au iourd'huy on le vinate) a plus de chaleur que le vieil : à peine d'en donner manifeste experience sensible, souz bõ depost. Mais ie me doute bien, qui a fait errer Surrelh, & autres meilleurs que luy , en l'autorité des anciens sur la chaleur du vin vieil & nouveau : c'est que par faulte d'auoir leu les antiques, qui ont escrit de la rustication comme Catõ, Pline, Columelle, & autres il aignoré la mode des anciens quât à faire le vin. car ils auoient coutume de faire monter la vigne marice aux oliues, hault iusques sur le faist des arbres, & l'õg de terre d'ond le fruyt estoit plus tardif, plus gros, & charnu, & plus acerbe. Puis quãd ils auoient vendangé, il slaissoient le vin longuemēt cuuer, engrossir, & exacerber en la grappe, tellemēt qu'ils faisoiet gros vins, rudes & austeres. desquels l'austerité astringente resserroit la chaleur: en sorte qu'elle n'y estoit en puissance iusque à tant q celle austere rudesse fust par tēps maturee

maturee & adoucie: & adonc ils entroiēt en leur chaleur qui cōtinuellemēt se augmentoit d'autant que l'acerbité se meurissoit. ioincte aussi la nature de leurs vignes Greques, Toscanes & Italiques qui portēt gros railins de tardive coction. Parquoy leurs vins vieux estoient plus chaulx que les nouveaux. Mais noz vignes qui sont gisantes pres de terre & receuantes la calorifique reuerberation des cailloux ou pierres eschauffees à l'oriental ou meridional, & portans petits raisins vineux d'ond les vins sont faicts soubz le pied, de claire liqueur & subtile substance, incontinent qu'ils ont bouilly, & demonstillé, ils sont chaulx & fumeux, la premiere annee plus que la seconde, & la seconde que la tierce, si ce ne sont vins cuuez & grappez. Par ainsi mon dire ne repugne au dire des anciens, qui ont parlé de leurs vins selon leur nature, qualite & facture, comme ie fay des nostres diuersement naturez, qualifiez, & faicts. Dond l'inconsyderation ou ignorance a tiré Surrelh en erreur & contradiction.

Je m'esmerueille que tu n'as rien dit des perles.

Pource que ie ne les tiens au nôbre de pierres côme Surrelh, qui par grand ignorance les estime minerales & terrestres, ou elles sont marines & extraictes des conques: d'ond comment pourroit il sa-
 uoir leur faculté & vertu: quand il ignore leur nature & substance, voire par auen-
 ture leur propre appellation és auteurs qu'il allegue? ou ie me doubte qu'il prent
 vne chose pour autre par ignorance de la propre signification des mots: voire que
 i'oseroie bien gager qui luy demanderoit le nom Latin, ou Grec d'une perle, il ne le
 sauroit dire proprement.

*Arnauld de Villeneuve au chapitre De
 ijs quæ naturalium &c.*

Il m'allegue tousiours ces auteurs sus-
 pects, & auxquels n'y a point de foy, & qui
 ne sont receuz sinon entre les imposteurs
Alchemistes & souffleurs: & encore il im-
 terprete ce passage à sa deuination, voire
 faulsement côme cy apres ie montreray.

Aristote dit que l'or, &c.

Ou cela? Homme de pouure iugement
 qui môtre bien n'auoir iamais leu Aristo-
 te! ne

te! ne eleu & sceu discerner les œuures
 supposez & faullement attribuez à l'Ari-
stote d'auec les vrais & legitimes. Et tous
 ces autres auteurs qu'il allegue, d'ond il
 ne vit iamais la couuerture: ains a recuil-
 ly ces passages en vn vieil liure intitulé le
 Grand Proprietaire François, où ils sont
 mis à plaisir. Et sur ce nous cuyde donner
 à entendr qu'il a fueilleté toute vne bi-
 bliothèque. Mais nous sauôs & cognois-
 sons telles impostures. Et encores quand
 ainsi seroit (ce que non) ie preposeroie
 neantmoins l'experience d'effect, à leur
 simple parole: en maintenant que l'or n'a
 aucune faculté medicale dâs le corps hu-
 main, nō plus que les pierres, pour preuue
 desquelles il amene en exemple les mar-
garites, qu'il prêt pour pierres, cōme aussi
 fait-il le Karabe. Ce qu'il ne feroit, si au
 lieu de ses Isaac & Abelai, nō leuz par luy
 mais citez en quelque vieil registre, ou il
 auoit leu le vray Aristote, Theophraste,
 Pline, & tels auteurs approuuez.

*Mais s'il est distillé in triplici vase, ou
 bien par descensoire.*

Ceste suppositiō bigarree cōme vn ha-
 bit de Suyfle, pour estre plus braue, argue

son auteur de grande ignorance au fait des extractions. Car, ou a-il veu distiller en triple vaisseau, ne à quoy seruiroit il? & encōre pis par le descensoire, qui par le feu superieur rend la matiere subiecte aduste, amere, & puante. Puis il conclut aux despens, dommages, & interests, cōtrefaisant le practicien courtisan aussi proprement qu'il a fait le legiste! & finalement le Iuge souuerain d'appel & de renuoy, le tout en disputation medicale, comme si ce fust matiere ciuile ou criminelle. Ho le braue maistre Aliborum!

Virtus argenti viui est calida.

Ceste allegation, & les autres suyuant es conferment mon dire, que l'argent vif est chauld. Parquoy ie ne les cōtrediets. si nō qu'il appelle impropremēt l'argent vif, la uacre, ignorant quel est le lauacre des metaux: ce que ie ne luy vueil apprendre.

Quant à ce que tu dis que le camphre est chauld.
le le dy encōre & le maintien. & tout ce que Surrelh produict à l'encontre, sont les mesmes opinions que i'ay ia refutes en mon liure auquel ie le renuoie sur ce point, pour ne faire redicte.

Ie laisseray tes iniures & viendray à la

Reubarbe.

Reubarbe.

Je n'ay iniurié personne, non pas mesme Surelh qui d'autres choses que de glorieuses iniures, & presomptueux outrages ne s'est armé contre moy: en quoy ie ne le vueil imiter: ains combattre par bonnes raisons, & certaines experiences. Quant à la Reubarbe son escript tesmoigne que malgré luy il condescend à mon opinion.

Quant à l'ambre gris.

Il dit que Lisset & moy ne sauons que c'est åbre gris. De cela ne vueil ie asseurer ne pour moy, ne pour Lisset: mais bien asseureray que Surelh, luy mesme ignore que c'est: prenant maintenant pour l'ambre gris vne medecine non nommee, nageante en la mer (qui aussi tost peut estre Asphalte que Ambre gris) maintenant disant, & affermant pour certain comme vn oracle, que c'est Esparme de Balene. ce qui est faulx. Car ce qu'on, appelle Sperma ceti, est toute vne autre chose que Ambre gris, dont iay suffisamment escript en mon liure, & déclaré les trois especes.

Et qu'il soit vray say desecher des choulx pourreaux, persil, espinards, & laictues.

H 2

Surrelh me baille icy de bonnes & belles herbes & bié propres à defecher: mais il n'en cognoit point d'autres. Puis me commande en faire du potage: pour faire experience du goust & faueur des verdes & seches: cōme si on reseruoit & defechoit icelles herbes seches pour potagerie, non pour la medecine, d'ond icy est question, & non de la coquine, confondant l'vne avec l'autre. Ce qu'il ne feroit s'il auoit leu Platon en la diuision des parties de la vie ciuile: ou il separe l'art de cuyline, d'avec la medecine.

Iusques icy i'auoye respondu par articulations à l'Apologie de Surrelh, & deliberoie de continuer, & articuler sur les deux fueilles encore restantes de sa belle Apologie pleine d'enormes fautes, & sottises, iniures, vains argumens, detorses & traueses des escritures, faulses allegatiōs & planieres menteries: comme de la langue Latine, qu'il dit estre preferee à toutes autres de la Chrestienté, de Galien vray Payen: du temps de sa vie, de Antoine empereur, mis pour Antonin, par non-sauance de l'histoire, & autres erreurs de ignorance & de malice: que ie proposoie
poursuy

pourfuyure iufques à fin de redargution:
 penfant auoir contention avec vn des
 bonnes lettres professeur (comme il fe dit)
 c'eft à dire maiftre d'efchole: ou vn mede-
 cin cōe il fe entiltre. Mais fur ce vint vers
 moy vn Medecin de Lyon, qui me dit l'a-
 uoir veu en paffant par faint Galmier: &
 l'auoit interrogué de fa profession: l'esti-
 mant estre medecin, ce que il luy nia: crei-
 gnant la preuue. Et luy mefme confessa
 auoir esté Apothicaire, & auoir laiffé l'e-
 ftat pour fe faire Empirique par le moyen
 de quelque peu de lettres Latines qu'il
 auoit, & d'experiences veües en l'apothi-
 cairie, avec certains recipez recueilliz,
 & la foufflerie, destillation, & extraction
 meflee parmi. En fomme luy refolut, qu'il
 estoit gueriffeur de vieulx vlceres: & que
 à cela il gaignoit la pouure vie de luy, de
 fa femme, & les enfans: q̄ ayant entēdu
 i'ay fait fin, quasi au milieu du cours: me
 repentāt d'auoir en telle sorte escrit, con-
 tre vn tel personnage: & que plutoft ne
 luy ay descrit la legende de fa vie, impo-
 stures, affrontemens, abus, tromperies,
desguisemens, parasiteries, escornifleu-
res, variations, changemens d'estat, ma-

les-versations, & vilainnies en tous lieux
 ou il a versé depuis qu'il descendit
 d'Auvergne. Ce que ie luy ap-
 preste s'il ne se contente
 de cecy. qui luy ser-
 uira comme d'un
 digestif at-
 tendât la
 purge.

FIN.

IAN SVRELH



IAN SURRELH ce gentil pres-
cheur

Qui en ses sermons crie & hule,
Monstre bien qu'il est imposteur
Avec son auteur Raymon Lulle.

Car sans soudre question nulle
Va broillant comme un engresseur:

Et se dit Medecin sans mulle

Des bonn

Des bonnes lettres professeur.